

卷一

皇明同姓諸王傳第一卷

吾學編第十四

海鹽鄭曉

吳元年冬 上念七子漸長宜習勞令內侍製麻
屨行滕凡出城稍遠馬行十七步十三洪武二年
設王相府是年令博士孔克仁授諸子經三年封
諸子王詔曰朕荷天地百神之佑祖宗之靈當羣
雄鼎沸之秋奮興淮右賴將帥宣力創業江左曩
者命大將軍徐達總率諸將以定中原不二年間
海宇肅清虜遁沙漠大統旣正黎庶靖安欲先論
武功以行爵賞緣土番之境未入版圖今年春復

命徐達等西征是以報功之事未及舉行朕聞昔帝王適子正儲位衆子封王朕今有子十人卽位之初已立長子標爲皇太子諸子之封本待報賞功臣之後然尊卑之分所宜早定乃以四月七日封第二子棧爲秦王次桐晉王次燕王次櫛吳王次楨楚王次榑齊王次樟潭王次杞趙王次檀魯王姪孫守謙靖江王皆授以冊寶設置相傳官屬及諸禮儀已有定制於戲奉天法古實爲生民明此彝倫非文武賢能三軍用命江左人民之助何以致此尚賴各盡心力以成治功六年春賜

諸王昭鑑錄又賜祖訓錄令書殿中宮中八年初定諸王宗人祿米每歲親王五萬石鈔錦紵絲紗羅絹布綿鹽茶粟又萬計靖江王二萬石郡王六千石鈔等減十九郡王諸子年十五人賜田六十頃爲永業除其租是年定王邸殿門名九年中書省議親王宮飾彩上曰惟儉養德惟侈蕩心居上能儉可以導俗居上而侈必至厲民獨不見茅茨卑宮堯禹以崇聖德阿房西苑秦隋以失人心諸子方及冠年去朕左右豈可使靡麗蕩其心是年申定王府官制語在百官述中再定諸王及公

主歲供之等秦晉燕王將之國 上令辭皇陵曰
若等觀祖宗肇基之地當知王業艱難又命皇太
子率三王祭開國功臣然後行會星變求言平遙
訓導葉伯臣應詔上萬言書言分封太侈用刑太
煩求治太速其論分封曰主上有天下掃除羣雄
如踣草莽包絡豪傑如臂使指公卿大臣數十萬
衆戰勝攻取者一介使召拱手聽命無敢後時况
敢有抗衡者乎傳曰都城過百雉國之害也先王
之制大都不過三國之一中五之一小九之一蓋
強幹弱枝遏亂原崇治本也國家裂土分封諸王

各有分地以樹藩屏復古制蓋懲宋元孤立宗室
不競之弊然秦晉燕齊梁楚吳閩諸國各盡其地
而封之都城宮室之制廣狹大小亞於天子之都
賜以甲兵衛士之盛恐數世之後尾大不掉然後
削其地而奪之權則起其怨如漢七國晉諸王否
恃險爭衡擁衆入朝甚則緣間而起防之無及也
議者曰諸王皆天子親子皇太子親骨肉所謂盤
石之宗天下服其強耳禮莫大於分使王侯之國
與京畿同則爲列國矣尚有君臣之分乎今秦晉
燕齊梁楚吳閩諸國連帶數十城而復優之以制

同姓諸王傳 卷一
假之以兵何不撫漢晉事觀之乎景帝高帝孫也
七國諸王皆景帝同祖父兄弟子孫也一削其地
遽構兵西向晉諸王皆武帝親子孫也易世後迭
相擁兵以危王室遂成五胡雲擾之患分封踰制
禍患立生援古證今昭昭然矣昔賈誼勸漢文帝
早分諸國地空之以待諸王子孫謂力少易使義
國小無邪心使帝盡從誼言必無七國禍願及諸
王未之國之先節其都邑之制減其衛兵限其疆
理亦以待封諸王之子孫此制一定然後諸王有
聖賢德行者入爲輔相其餘世爲藩輔可以與國

同休世世無窮矣 上大怒曰小子敢間吾骨肉
吾見且切齒可使吾兒見乎速取來吾將手射之
且啖其肉逮至瘦死刑部獄十九年冬詔王國慶
賀惟國城官致禮在外文武官不得赴府賀有事
遣人啓聞不得遣將官二十年秋詔給親王歲祿
五萬石停茶鹽布絮勿給二十六年賜諸王永鑑
錄二十八年八月更定宗人封爵冊寶之制親王
金冊金寶王妃金冊無寶皇太子之庶子年十歲
封郡王塗金銀冊銀印親王嫡長子年十歲封王
世子塗金銀冊銀印庶子年十歲封郡王冊印亦

如之凡王世子必以適長以庶奪適降庶人重則遠竄王年三十妃未有子庶子止封郡王俟王與妃年至五十無適子始封庶長子爲王世子凡嗣封受封納妃朝廷遣使行冊命禮郡王次子授鎮國次孫輔國次曾孫奉國皆將軍凡三等次玄孫等親王女曰郡主郡王女縣主郡王孫女郡君郡王曾孫女縣君郡王玄孫女鄉君凡五等靖江王視郡王降一等宗人有文武才能堪任用者宗人府名聞考驗陞轉如常選法有犯宗人府訊聞

量罪降等重斥爲庶人罰而不刑責先是 上謂戶部尚書郁新曰朕今子孫衆盛原定親王歲祿五萬石今天下官吏軍士多俸給彌廣其斟酌古今稍節減以資乏用至是上議更定親王歲祿萬石郡王三千石鎮國將軍一千石輔國奉國將軍六百石鎮國中尉四百石輔國中尉三百石奉國中尉二百石公主及駙馬二千石郡主及儀賓八百石縣主及儀賓六百石郡君及儀賓四百石縣君鄉君次減一百石皇太子庶子旣封郡王俟出閣歲賜如親王子封郡王者女俟嫁歲賜如親王

女已嫁者卽王子嗣郡王者比始封郡王減半祿
是時重定祖訓錄名 皇明祖訓遣使召諸王至
京諭減祿之故賜 皇明祖訓九月新言親王歲
米既有定議請令有司如數給之 上曰晉燕楚
蜀湘府給如數代肅遼慶寧谷府遠在邊民少賦
薄歲且給五百石齊府千石嗣秦王幼應用米有
司月進其罷給及多寡異者並出一時權制云十
月製二十字命名詩登玉牒三十年勅遼寧諸王
據邊場孳牧勿侵民田是年令王府官不得三六
九年考覈建文卽位詔王國所在惟國事聽王文

武吏士聽朝廷王不得節制永樂二年諭天下諸
司事關王府遵祖訓啓王有司合行事務不許槩
啓若王府事馳奏不待報輒行者重罪論三年五
月 上以代寧秦晉諸王屢驕恣怨謗賜書戒飭
諸宗人宣德元年定將軍主君儀賓品級冠服儀
式王府官不得外調陞不知起於何時或曰靖難
後事也然宣德中周忱以越府長史陞侍郎巡撫
江南鄭府長史王淪改行在戶部郎中洪熙中淮
府長史王榮改吏科左給事中荆府長史曹曼齡
改翰林修撰矣嘉靖八年大學士楊一清言楊士

竒以審理副選翰林編修周忱亦自長史累陞尚書成化年雷霖以德府長史爲山西提學副使又言布政使雍泰秦府有姻亦陞巡撫都御史乞容王官與別官一體陞用王親亦選京官吏部議此祖宗微意如近年江西婁性足爲監戒况王親縱不得京任得仕至左右布政使官與尚書等使非區區自懷重內輕外之心則展布才猷亦足自見一清請再議吏部執不可二十二年蜀府長史高鵬九年考滿至吏部吏部請奪職遂請王府官凡稱病乞改用者並勒致仕輔導失職調者不得授

府州縣親民官時陝西山西河南湖廣積欠王祿百數十萬有司不能給宗人輒告飢譁有司有司或杜門或逾墻走每下詔卽念宗人歲祿顧歲祿百倍洪武時有司竟不能給初制定親王歲祿萬石惟肅岷府千石正統初岷府加二百石後加三百石伊遼府二千石韓府三千石唐府五千石代府六千石郡王將軍中尉儀賓之祿幾千倍於國初於是宗人有上言願停祿如唐宋故事得應舉效用者有請田力耕自養者竟莫敢決宗人有罪者錮高墻高墻在中都凡先後入高墻者男女且

同人諸王傳 卷一
千人嘉靖四年釋二百九十人十二年釋十三人
十三年又釋三十八人十八年又釋四十五人傳
還原邸給薪水自便

廟祔十五王

廟祔十五王初從祀四祖廟東廡壽春下蔡南昌
盱眙寶應來山英山昭信凡八王西霍丘安豐蒙
城臨淮六安都梁山陽凡七王熙祖皇后生仁祖
及壽春王仁祖陳后生南昌盱眙昭臨淮三王三王
皆高帝同母兄也十五王惟壽春盱眙昭霍丘安豐
蒙城臨淮六妃配食南昌王者文正父也妃王氏

祔葬皇陵不入配正德中御史徐文華言族無後
者祭終兄弟之孫之身今太廟配享諸王未審於
高皇何親大抵非兄弟即伯叔至於今五世六世
矣禮宜祧禮官議不從嘉靖中建九廟東西廡配
如故九廟災復同堂異室之制祔十五王於兩序
先是洪武二年定從享禮稱壽春王皇伯考南昌
霍丘下蔡安豐蒙城盱眙昭臨淮七王爲皇兄寶應
六安來安都梁應山山陽昭信七王爲皇姪壽春
王稱皇高伯祖考寶應七王稱皇曾伯祖考若與
宣宗 英宗兄弟行者誤也鳳陽有十王四妃墓

同姓諸王傳 卷一
在白塔陳后二女長太原長公主駙馬都尉王七
一次孝親公主追封隴西長公主駙馬都尉思親
侯李貞岐陽王父也南昌王有女福成公主蒙城
女慶陽公主洪武四年定親王女稱郡主禮官請
降二公主 上念二兄早歿惟二女吾不忍降奪
與祿歲五百石駙馬都尉王克恭黃琛為福建淮
安衛指揮使仍稱駙馬食指揮使俸

懿文太子

懿文太子標母 高皇后元乙未九月生于太平
陳廸家 上為吳王立為王世子從宋濂受經吳

元年年十三矣 上遣世子及弟謁臨濠墓諭曰
世稱商高宗周成王為守成令主高宗舊勞于外
成王早聞無逸之訓皆知小民疾苦故其在位勤
儉不敢驕逸兒生長富貴習於晏安今出旁近郡
縣遊覽山川經歷田野因道途險易以知鞍馬勤
勞觀小民生業以知衣食艱難察民情好惡以知
風俗美惡即祖宗所居訪求父老問吾起兵渡江
時事識之於心以知吾創業不易又命中書省擇
官輔行凡所過郡邑城隍山川之神皆祭少牢過
太平訪廸家賜白金五十兩至泗濠以 上意告

祭祖考妣考妣及兄姊墓是冬從 上觀郊壇令
左右導之農家徧觀其服食器具又指道旁荆楚
曰古用此爲朴刑以其能去風雖傷不殺人古人
用心仁厚如此兒念之洪武元年正月立爲皇太
子帶刀舍人周宗上書乞教太子 上嘉納中書
省都督府放元制請以太子爲中書令不許曰吾
兒年未長學未克更事未多宜尊禮師傅習經傳
博古通今識達機宜他日軍國重務皆令啓聞何
必爲中書令乃選勲德老成舊人動有典則及新
進之賢者兼領東宮官於是左丞相善長右丞相

達中書平章錄軍國重事遇春兼太子少師少傅
少保右都督馮宗異兼右詹事 中書平章政事胡
廷瑞廖永忠李伯昇兼同知詹事院事 中書左右
丞趙庸王溥兼副詹事 中書叅政楊憲傅瓛兼詹
事丞同知大都督康茂才張興祖兼左右率府使
大都督府副使顧時孫興祖兼同知左右率府事
僉大都督府事吳楨耿炳文兼左右率府副使御
史大夫愈和兼諭德御史中丞基溢兼贊善大夫
治書侍御史文原吉范顯祖兼太子賓客諭之曰
朕東宮不別設府僚而以卿等兼領者蓋軍旅未

息朕若有事於外必太子監國若設府僚卿等在
內事當啓聞太子或聽斷不明與卿等意見不合
卿等必謂府僚導之嫌隙易生朕所以特置賓客
諭德等官輔成太子德性且選名儒爲之賓客昔
周公教成王克詰戎兵召公教康王張皇六師此
居安慮危不忘武備蓋繼世之君生長富貴泥於
安逸不諳軍旅一有緩急罔知所措二公所言不
可忘也是年 上命選國子生國琦王璞張傑等
十餘人侍讀書禁中琦等入對謹身殿姿狀明秀
應對詳雅 上喜因謂殿中侍御史安慶儒士郭

淵友等曰吾觀諸生於文藝素習矣然與太子處
當端其心術養其德性庶不流於浮靡太子之德
亦當有助因厚賜之未幾以梁貞王儀爲太子賓
客秦鏞盧德明張昌太子諭德先是建大本堂取
古今圖籍充其中徵四方名儒教太子諸王分番
夜直選才俊之士充伴讀 上時時賜宴賦詩商
確古今評論文字無虛日命諸儒作鍾山龍蟠賦
置酒歡甚又自作時雪賦賜東宮官儒官服令三
師賓客諭德朝賀東宮東宮答拜二三年命東宮
及王府官編輯經史古人行事可爲鑒戒者訓諭

太子諸王四年春製大本堂玉記賜太子十年六月令自今政事並啓太子處分後奏聞因諭曰人君治天下一日萬幾自古創業之君歷涉勤勞達人情周物理故處事咸當守成之君生長富貴若非平昔練達少有不繆者故吾特命爾日臨羣臣聽斷諸司啓事以練習國政惟仁不失於踈暴惟明不惑於邪佞惟勤不溺於安逸惟斷不牽於文法凡此皆心爲權度凡人雖有明敏之資自非歷練臨事率意而行未免有失知悔而改亦已晚矣吾自有天下以來未嘗暇逸於諸事務惟恐毫髮

失當以負上天付托之意戴星而朝夜分而寢爾所親見爾能體而行之天下之福吾無憂矣時令儒臣爲太子講大學衍義二十二年置詹事院

上諭吏部侍郎侯庸曰輔導太子必得忠正賢良之士以兵部尚書唐鐸兼詹事二十四年八月勅太子巡撫陝西 上意欲都陝西遣太子相宅也旣行使諭曰爾自幼至長未嘗遠出今命爾巡行陝西方渡江天道赫然有變雷起東南爾征西北以造化言之雷天威也爾前行雷後從威震之兆也然一旬之間久陰不雨占法主陰謀事爾宜慎

舉動節飲食嚴宿衛親君子遠小人務在存仁養性施仁布惠以回天意雷之嘉兆未可恃也爾其慎之比還獻陝西圖遂病病中上言經畧建都事二十五年四月丙子卒上慟哭命禮官議喪禮戊寅上御東角門召諭廷臣吾老矣太子不幸命也大哭而退既公除上不忍禮官請之始鳴鐘鼓朝京耆老上香慟哭上亦哭諭曰爾念太子意良厚顧農事方興諸父善勤生亟歸勿失時諸未至者諭朕此意八月庚申祔葬孝陵東謚懿文冊曰朕惟先王之典生既有名歿必有謚名所

以彰德謚所以表行故行有大小則謚有重輕此古今通義雖在至親不敢廢也爾皇太子標居位二十有五年分理庶政裨贊弘多今焉永逝特遵古典從公議賜爾謚曰懿文嗚呼德以名彰行因謚顯公論所在朕何敢私建文元年追尊爲孝康皇帝廟號興宗靖難後復稱懿文皇太子太子元配常氏開平王女太子既立上念王有大功早卒遂冊其女爲皇太子妃先太子數年卒謚懿敬建文君卽位追尊爲孝康皇后靖難後復稱懿敬皇太子妃太子繼妃呂氏生建文君妃父本壽州

同姓諸王傳 卷一
人仕元爲元帥府都事丙午歸附爲中書掾史累
官吏禮二部尚書出爲都轉運鹽使終太常卿本
無子洪武中卒建文君卽位尊妃爲皇太后靖難
兵入金川門遣人迂太后太后至 成祖述不得
已起兵之故太后還未入宮宮中火起建文君遜
去建文四年七月隨其子敷惠王允熾居太子陵

秦王

秦王棧洪武三年年十五受封二十三而之國西
安初聘元河南王王保保女弟繼妃寧河王女也
王生而岐嶷嚴毅英武 上委以關西兵事得專

行賞罰歲秋巡邊大將皆聽節制御軍整肅所過
秋毫無犯未嘗妄戮一人二十七年征降西番賜
璽書賞賚萬計時露宿山野遘疾尋卒在位二十
七年年四十 上命禮部尚書任亨太定喪禮謚
愍愍王六子長尚炳二十八年嗣在位十八年卒
謚隱次永興簡懿王尚烈保安懷僖王尚煜興平
恭簡王尚焯永壽懷簡王尚烜安定王尚炆尚炆
永樂十年坐罪降庶人安置泗州宣德末赦守愍
王墳隱王子四人適子志垣永樂十年嗣在位十
三年卒謚僖無子庶兄志均永樂二十二年以渭

南王進封王請長興侯故宅處諸弟又請選良家女入宮令擇護士家女酬直勿抑勒在位三年卒謚懷妃張氏未婚而寡宣德元年令入宮守王服王無子弟志潔宣德三年以富平王進封王四年坐罪辭三護衛在位二十八年卒謚康志堞宜川莊靖王也康王五子長公錫天順二年以秦世子嗣在位二十九年卒王好文睦族知禮謚惠公鍵未封卒公銘臨潼惠簡王嘉靖十七年以孫秉機嗣王追封秦安王公鏜邵陽惠恭王公鎰汧陽端懿王惠王四子長誠泳成化四年以鎮安王嗣在

位十一年卒王好書崇儉有禮謚簡誠滄誠河誠淖皆未封簡王無子安王六子誠深嗣臨潼王謚和僖嘉靖十七年以子秉機嗣王追封秦莊王誠潤誠浩誠澈誠波誠注皆鎮國將軍莊王二子秉機以嗣臨潼王弘治十三年進封王在位二年卒謚昭昭王三子長惟焯正德四年嗣次惟燁次未名王請潼關以西鳳翔以東河墀地曰皇祖以賜臣先王機也戶部尚書梁材執議曰陝西外供三鎮內給四王民困已極視國初生產物力千萬不佯豈得空地更給諸王上從材言不許王早

失父母育於簡王妃廖氏廖妃卒王喪如禮事其
生母蕭妃孝謹守臣以王謹身修行聞遣勅使持
旌幣旌王嘉靖二十年上黃金千兩白金萬兩助
建宗廟 上喜加祿歲二百石贈玉帶一

晉王

晉王桐年十三受封又七年之國太原已而得罪
廢懿文太子調護得還洪武三十年卒謚恭世子
濟熿嗣靖難後封濟熿弟濟熿平陽王濟炫慶成
王濟熿子美圭封晉世子濟熿狠戾失愛憾其父
并憾濟熿不爲解喉慶成諸王日訴濟熿過於朝

又誘府中官校誣濟熿罪竟奪濟熿爵并廢美圭
爲庶人守恭王園濟熿遂得嗣王益驕橫百方幽
苦濟熿父子恭王有老媪不能平走訴 文皇立
召獄中晉府承奉左徵問之盡知濟熿構濟熿狀
卽釋徵馳驛召濟熿父子時濟熿囚空室已十年
左徵者濟熿嘗言其佐濟熿爲逆逮治京師府中
言徵死久矣徵至一府大驚徵入空室解濟熿縲
繼相抱持大慟濟熿自是怨望出悖語濟熿父子
見 上行在所濟熿病甚 上見之惻然不直
濟熿遂封美圭爲平陽 俾奉父居平陽恭王故

有田在連伯灘。文皇美圭矣。濟熿奪不與美

圭聞上。仁宗再三諭熿。熿還美圭不從美圭言

連伯灘地隸平陽不隸太原。因及曩誣構事。仁

宗遣人視灘果隸平陽。又書諭濟熿美圭父子困

頓累年。詩曰脊令在原。兄弟急難。每用吟詠感念

無已。緬惟賢弟同吾此心。又書諭美圭朕諭晉王

讓汝田。兄弟叔姪本同一氣。姪事叔益恭愛。久當

憐汝。濟熿得書。又聞朝廷賜濟熿王冠服。遂廣致

妖巫府中造呪詛事。仁宗崩。又不服喪。宣宗

卽位。憐濟熿父子時時問勞。濟熿呪詛事益露踪

跡。自度罪不可解。遣人結高煦謀不軌。日夜造兵

器。寧化王濟煥告變。上曰勿洩。擒高煦。又得濟

熿與交通書。上又曰勿洩。濟熿固自知益反側

不安。其所遣詣高煦人。又走京師。首服。內使劉信

又奏濟熿擅取屯糧十萬餘石。給護軍。欲反應高

煦。并呪詛事。寧化王又言濟熿毒弑其母。濟熿始

懼。辭王爵及護衛。不聽。遺書及勅符。召濟熿。至示

以諸所發奸逆狀。濟熿伏地頓首。言臣罪萬死。

上書諭諸王去歲高煦反。罪人旣得。奸黨人皆言

趙晉二王實與謀。予未忍信。今晉府人累上告變

徐察之有驗不誣趙王自知事不可掩已辭護衛
濟熿得罪宗社不敢以私親廢大義謹遵祖訓免
爲庶人屏之鳳陽誅其同謀及妖巫數人恭王妃
在晉府者令美圭迎平陽奉養復濟熿晉王卒謚
定美圭正統初嗣王卒謚憲子鍾鉉嗣卒謚莊奇
源世子未嗣卒以孫嗣王贈晉靖王靖王子表
世孫未嗣王卒以子嗣王贈晉懷王懷王子知焯
以世曾孫嗣卒謚 姪新塹以新化王庶長子嗣
王新化王者晉靖王次子表棟也謚恭裕恭裕王
子端和王知焯端和王二子新塹新塹端和王卒

晉王請端和王庶長子新塹嗣新化王未封而晉
王卒無子晉靖王庶子榮澤王表檉與新化諸王
皆晉王叔兄弟也曰嗣王者非新塹卽新塹然皆
幼攝府事則我長晉王妃王氏曰晉王無後次及
新化王新化王父子卒有孫新塹在也卽召入府
拜几筵爲後行喪榮澤王忿我叔父行顧不得王
新塹端和王長子長子不得爲人後新塹宜嗣新
化王新塹嗣晉王禮也疏下禮部議新塹宜嗣晉
王俟服闋請封又言制親王絕郡王以序繼親王
爵其郡王不得復請繼封次子止封鎮國將軍新

同姓諸王傳 卷一
六
與得嗣晉王贈父晉康王

周王

周王橐秦晉二王皆 高皇后子周王育於孫貴妃妃卒服以慈母斬三年主喪事洪武三年封吳王國錢塘工部尚書張允請建諸王府 上曰吳府且勿建七年置杭州護衛 上以浙江財賦地不可封王罷護衛十一年改封周王國開封卽宋故宮爲府二十二年王棄其國來鳳陽遷之雲南未行原還國建文中人告王反建文君命曹國公卽訊景隆大索金寶王不能應坐王反王懼遂竄

雲南諸子並別流放已而召還南京靖難兵入金川門王與齊王見 成祖且拜且哭因並轡行登樓相慰又哭遂得復封王加祿五千石以開封圮於河改建邸洛陽已而又還開封封其長子有燉爲周世子有勲汝南王有烜順陽王有燭祥符王有熿新安王有光永寧王有煊汝陽王有燿鎮平王有熈宜陽王永樂二年來朝獻騶虞八年請祀太祖國中 上書諭支子不得祭 太祖王國祖始封之君不許已而數有過 上輒赦不問有告王反者遣都御史王彰諭意王大懼 上還護衛

仁宗卽位加祿五千石通前一萬石卒謚定子有燉嗣宣德元年王請詣闕謝諸弟封不許止弟汝南王有勲數誣王。上爲書諭王先是有勲與有熹素惡有燉爲與趙王書刻祥符王印記封識置彰德城外道傍都指揮王友得書聞上。宣宗疑有離間逮友訊無迹召有燉至曰必有勲也爲此書者又召有勲訊服詞連有熹有勲志行故不減少與高煦善建文中嘗告父定王反定王竟囚繫除國靖難後始釋遂乞誅有勲。上遣有勲去雲南居大理後定王老始歸河南有熹喜生食人腦

肝膽薄暮每伺人過門輒誘入殺而食之以故其邸前日未晡卽斷行跡。宣宗惡有勲有熹免爲庶人留有熹居京師已復爵有燉卒謚憲弟祥符王有燉嗣景泰三年卒謚簡子世子子屋嗣卒謚靖無子弟通許王子墜嗣卒謚懿子同鑣嗣卒謚惠子安瀕世子卒以子睦樞嗣贈周悼王睦樞卒謚恭世子勤熄未嗣卒世孫朝垞迎駕加祿歲三百石贈金幣嘉靖十八年嗣王二十一年巡撫魏有本上言河南諸宗人缺祿米三百萬石諸將軍安淄等五百人譁椎行臺門凌逼撫臣安淄坐革

爲庶人二十一年王及宗人獻白金六千兩助修太廟賜玉帶一圍衣一稱

楚王

楚王楨母胡克妃甲辰年生七歲而封國武昌永樂元年世子孟烷市人河南諭世子世子來朝請葺府邸諭俟有年二年王出鐵牌開武昌城門都司聞上不許卒謚昭孟烷嗣宣德元年發楚魯二王護兵各千人征安南王請湖廣都司給護兵兵器五年有告王者乞減護衛三之二王宮火焚譜系符勅更給之卒謚莊子季塊嗣卒謚康弟

季叔嗣卒謚憲子均鉞嗣卒謚靖子榮滅正德七年嗣在位二十三年卒謚端子顯榕嘉靖元年以長樂王封世子十四年嗣子英耀十六年以世孫封世子嗣王

齊庶人

齊庶人搏洪武二年封青州府十五年上令出獵開平且備胡二十四年春勅再出開平時潁國公傅友德總兵諭勿相叅奏凱勿矜功八月秋高水冷回京建文時有告變者召至京廢爲庶人時周王已削爵與搏皆繫禁靖難兵至急遣兵衛二

王二王不知靖難兵也大怖伏地哭已知之乃大喜曰吾屬幸不死矣永樂改元復封又封其子賢煇爲樂安王賢峻長山王賢寔平原王博之國驕縱上輒書諭戒來朝又面諭博曰無忘患難時博益自疑陰蓄亡命養刺客僭帝號爲呪詛輒用護衛兵守青州府城北門自廣智門外接園苑築墻截往來守吏不得登城夜巡李琪曾名深等上變告博匿其人滅口三年賜書索琪諭博改過是月周王橚上書悔罪上封橚書示博明年來朝面謝廷臣劾博罪請論如法博厲聲曰奸臣喋喋

無乃效建文時殺我會當盡斫此輩上聞之益

怒留博京邸奪其護衛指揮柴真等伏誅罷遣罪斥府諸寮盡出王繫囚及諸造不法械器羣臣又請罪教授葉垣等上曰齊王凶悖縱恣性習使

然朕與王君臣兄弟出之囹圄寵以祿爵恩禮渥洽誠心溫詞開諭至六七不悛教授輩奈王何況垣等皆先自歸發其事可勿論博留京益有怨言乃召其子至京父子並奪爵妃吳氏先卒葬青州宣德三年福建妄男子樓濂詭稱七府小齊王建陽人製王冠服謀不軌縣發其事械至京誅數百

人搏及賢烜三子暴卒景泰五年五月勅南京守備叅贊齊庶人谷庶人安置廬州者移置南京慎防之時齊庶人賢赫搏少子也尚幼谷庶人絕而齊庶人請得谷庶人第嘉靖十三年釋高墻庶人長鑿者搏曾孫也

潭王

潭王梓母達定妃洪武二年纔一歲受封封十五年之國王幼聰敏好學善屬文嘗召府中儒臣設醴賦詩爲品高下出邸中贊爲實洪武二十三年妃與民家坐事王不自安上遣使慰諭且召王

入見王大懼與妃自焚死無子國除

趙王

趙王杞洪武二年生明年四月封趙王封之日秦晉燕吳楚五王升殿受冊寶齊潭趙魯四王幼內宮保抱抱四王就位保抱受冊寶也又明年杞卒

魯王

魯王檀母郭寧妃其妃湯信公女王生兩月而封洪武十八年之國兗州幼聰敏好文學善詩歌好餌金石藥二十二年發病卒命禮部尚書李原名議喪禮上曰父子天性謚法公義朕不得以私

恩廢公義可謚荒子肇輝永樂元年嗣王宣德初

上言長史鄭昭賢而老請致仕 上諭蹇義曰魯

王賢禮士宜如請宣德九年卒謚靖子泰堪成化

三年嗣九年卒謚惠子陽鑄成化十二年嗣嘉靖

十二年謚莊世子當澗早卒嘉靖十三年以孫觀

焯嗣王贈魯懷王懷王子健棧封世孫早卒以子

觀焯王贈魯悼王

皇明同姓諸王傳第一卷

子履準校

孫心材重校

皇明同姓諸王傳第二卷

吾學編第十五

海鹽鄭曉

蜀王

蜀王椿母郭惠妃滁陽王女也洪武四年生生十

一年而封成都惠妃生王及代谷二王永樂汝陽

二公主王元妃涼國公女王讀書好善近儒生能

文章 高皇呼為蜀秀才未之國歲清明遣祭滁

陽王墓於滁州之國初即聘漢中教授方孝孺教

世子待以賓師禮推恩母族歲時問遺不絕常發

祿贍郡教授月一石當是時邊王歲出塞征胡王

以雅好學問守西垂安靖與民休息永樂三年來朝二十一年卒謚獻六子長悅嫌次悅燿悅燿悅所悅燿悅煇悅燦早卒謚悼莊世子嫡孫友堉末樂二十二年嗣初友堉爲世孫叔華陽王悅燿謀奪適獻王怒斥去不悛囚而繫之又不悛益怒誣友堉罪於朝 文皇召友堉叔姪自明比至 文皇崩 仁宗察悅燿誣世孫得嗣王之國未幾悅燿又走京師誣友堉 仁宗怒抵奏地下曰適庶大倫干分誣親獨不畏鬼神乎謂侍臣曰悅燿忠孝懷奸讒使歸蜀終亂其國徙武岡州又徙

州宣德五年友堉府中忽舉炮銃總兵陳懷聞上罪府官上還護衛三之一已而請王府官屬留軍中南人爲匠皆從之宣德六年卒謚靖無子宣德七年弟友堉以羅江王嗣友堉獻王孫靖王母弟也宣德九年風疾 上念王賢走醫調視未至卒謚僖無子叔悅燿宣德十年以保寧王嗣儉飭守禮法天順五年卒謚和子友堉善草書天順七年以世子嗣是年卒謚定子申鉉天順八年嗣成化七年卒謚懷無子是年弟申鑿以通江王嗣好學能文弘治六年卒謚惠明年子賓瀚嗣仁厚好

儒術正德三年卒謚昭明年子讓栩嗣嘉靖十五年守臣言王忠孝賢良上特褒賞二十年上黃金千兩白金萬兩修宗廟加祿歲二百石玉帶一王受玉帶辭祿世子承鑰

湘王

湘王柏洪武四年生生八年封荊州母胡順妃豫章侯美女也王明敏好學能文章尤喜道家言自號紫虛子膂力過人握弓矢刀槊上馬奮如飛建文元年或告王反建文君遣使即訊王懼縱火宮中奮身投火妃從之闔宮皆死謚戾妃江陰侯高

女無子國除葬江陵西大暉山靖難後改謚獻治其墳祠

代王

代王桂其妃武寧王女洪武十一年封豫王二十四年改封代王明年之國大同建文時廢爲庶人靖難後復封宣德二年王請得樂器制器王妃仁孝文皇后妹也王不悅妃妃病王不視孫仕壘聞於朝乞勅潞城王遜炘啓王善視妃九年王欲率諸子孫來朝不許王又與其子遜炘遜焞褻衣冠遊行市中袖錘斧傷市人上與書戒飭稍斂戢

正統十一年卒謚簡十一子世子遜熾早卒正統十三年以子仕壘王贈代戾王仕壘正統十一年嗣嘗上言總兵郭登有功大同虜欲得大同爲巢穴非登大同不能守朝廷爲勞登天順七年卒謚隱子成鍊嗣弘治二年卒謚惠子聰沫嗣坐罪徙山西省城弘治十一年卒謚思子俊杖嗣嘉靖三年大同軍叛王東走宣府 上遣光祿少卿蕭淮問王嘉靖六年卒謚懿九年子克權嗣請郡王庶子祿禮部言郡王庶子無長兄得嗣郡王者封長子不復得支將軍祿長孫亦如之不許十一年大

同軍又叛王東走宣府 上又遣官問王王父子再遭禍變忠慎自檢得不爲諸逆染鱗十八年秋樂昌王乞徙代州禮官周旋得徙朔州禮科都給事中丁湛上疏曰樂昌一府以城域狹隘物價騰貴得徙代王亦以是爲請何以應之天下宗藩類皆聚處一城亦皆以是爲請又何以應之况代藩北控邊鄙南輔圻甸比之他藩尤爲要重數年以來叛者繼起稔惡不悛皆積疑所致近甫少寧正宜休息示以安靜乃今宗親無故改遷搖惑衆志不可已而樂昌王竟徙朔州先是景泰五年昌化

王仕潭言大同地瘠乞移封就祿便養 景帝亦不許

肅王

肅王模洪武十一年封漢王二十四年改封肅王於甘州建文元年乞內徙徙蘭縣永樂十七年卒謚莊庶長子瞻炤二十二年嗣正統元年言甘州舊邸改都司而先王墳園尚在乞留近邸林木從之府中嘗被盜劫榜募告捕者賞馬銀御史以聞罪其長史楊威又請加祿 宣宗曰洪武永樂間肅王歲祿五百石莊王不言者以朝廷念地遠輸

轉甚難故也 仁考卽位加五百石矣朕遵祖訓不敢違天順八年卒謚康子祿埤成化四年以洵陽王嗣十五年卒謚簡子貢綜成化二十三年以汾川王嗣正德中爲諸子請菜戶不允嘉靖十五年卒謚恭子真淤弘治四年封世子嘉靖五年卒謚安和次子弼枕初封鎮國將軍嘉靖十一年改封世孫十七年嗣王贈其父肅靖王

遼王

遼王植洪武十年生母韓妃也生二年封衛王改遼王國于遼東廣寧五衛盡屯田 給王祿

王得巡邊出塞練簡士馬已而坐罪奪祿衛靖難
兵起渡海歸朝改封荊州 文皇卽位來朝卒謚
簡子貴烱嗣正統元年府臣乞加祿 上言簡王
得罪朝廷 太祖特加原貸削其儀衛止與尉校
三百人 仁宗命今王嗣倍加祿得支二千石
宣宗又與旗軍三百人朝廷親親已至王於庶母
諸弟寡恩府臣不聞匡正直爲王請加祿不允四
年坐滅絕天理潰亂人倫廢爲庶人簡王第四子
貴燮以興山王嗣卒謚肅子豪盛嗣世子恩鏞卒
謚榮穆王請以世子妻妾殉葬 憲宗不許卒謚

靖子恩鏞嗣卒謚惠子寵授嗣卒謚恭子致格嘉
靖三年嗣卒謚莊子憲櫛初封句容王嘉靖十八
年嗣

慶王

慶王梅母余妃洪武十一年生二十四年封慶陽
二十六年徙韋州建文三年冬移寧夏 文皇令
歲一至韋州度夏宣德初上言寧夏卑濕水泉惡
乞仍居韋州不許許歲一往來韋州如 文皇時
未幾護衛人告王閱兵造戎器購天文書 上書
諭王小人誣叔祖置之法慎勿疑內臣馬安住歸

自寧夏言王以謗故不自安 上又書慰王五年
王請入朝不許王遂請移家寧夏如永樂洪熙得
往來韋州許之正統十三年卒謚靖子秩燧十四
年嗣景泰元年以虜數入寧夏與其弟安化王秩
炆上書乞徙內地不許又言冕服以紗製請易紵
絲 上曰祖制朕不敢易成化五年卒謚康子邃
暨成化七年以平涼王嗣十五年卒謚懷弟邃塤
成化十七年以岐陽王嗣弘治四年卒謚莊子寘
暨弘治七年以洛交王嗣十年卒謚恭子台宏弘
治十六年嗣時虜數入塞賊發恭王墓嘉靖四年

謀不軌法司請如代王聰沐例徙西安 上不許
降庶人留邸歲與米三百石已又不悛徙西安其
長子藁攢封世子攝府事十二年世子及懷王妃
王氏乞恩留台宏故邸禮官執議不可十五年兩
宮徽號詔許台宏還邸與一帶郡王九安化反誅
絕安化王寘鏞者慶靖王命孫也祖秩炆慶靖王
第四子永樂十九年封安化 謚惠懿父邃塤封
鎮國將軍弘治六年贈安化 和王寘鏞成化二
年封長孫弘治五年嗣正德 平奄瑾擅權毒亂
天下寘鏞遂起逆謀告生員 京文曰日者言我

有帝王骨相王九兒降鸚鵡神妄言禍福每見寘
鑄呼老天子寘鑄益冀望非分會大理少卿周東
度田寧夏倍益頃畝畝索厚值徵馬屯租甚急景
文謂寘鑄曰殿下欲圖大事此其時矣寘鑄遂爲
酒召都指揮何錦周昂指揮丁廣謀反以誅奄瑾
爲名是年四月五日寘鑄爲酒大會巡撫安惟學
總兵姜漢周少卿李守庵奄及漢至巡撫少卿辭
不至錦等矯言虜入塞急呼壯士申居敬等捕虜
執兵械跨馬呼噪儀賓韓廷璋等伏府序下錦等
趨安化府樞門入序中伏兵起殺漢及奄走行臺

殺惟學都指揮楊忠又殺周少卿縛侯叅議放獄
囚焚官府劫庫藏奪河舟大索慶諸王將軍金幣
萬計呼召逆黨草虜城千戶徐欽引兵入城僞造
印章旗牌又令景文爲僞檄言瑾蠱惑朝廷變亂
祖法屏棄忠良收集兇狡阻塞言路括歛民財籍
沒公卿封拜侯伯數興大獄羅織無辜散遣官校
脅持遠近張綵劉機曹雄毛倫文臣武將内外交
結意謀不軌今特舉義兵清除君側凡我同心並
宜響應傳布邊鎮以錦爲討賊大將軍昂廣左右
副將軍景文軍師張欽先鋒將軍魏鎮等七人都

同姓諸王傳 卷二
護朱霞等十二人總管當是時遊擊將軍仇鉞陷賊中欲起擒賊自效恐河東兵未集稱病臥鉞蒼頭潛入城言副總兵楊英都指揮韓斌延綏副總兵侯勛遊擊將軍時源各率兵屯河上廣武營都指揮孫隆焚兩壩掃捲河舟盡奪泊東岸矣鉞喜尚稱病臥錦率都指揮鄭卿等三千人出戰渡口留昂守城昂問鉞病鉞猶稱病不起伏諸蒼頭候昂入殺昂鉞卽起開門一呼諸遊兵壯士楊真等聞之卽趨安化府殺朱霞等十一人擒竄緡及其子台潛遣古興兒密告鄭卿令反正卿遂殺魏鎮

等十人錦廣走追擒之賀蘭山外朝廷聞變遣都御史楊一清太監張永督諸軍討賊未至寧夏賊平一清永至陝械寘緡錦廣等至京頌繫寘緡諸王館錦廣等下錦衣獄廷鞠伏誅弟寘鏡寘錫坐黨廢庶人將軍寘材俘至京旣論死正德中山僧大千和尚者富財凌同類同類毆和尚和尚憤曰我皇帝家人也衆異其言聞於朝逮至京下刑部獄和尚曰我安化府寘材也衆不能辨安化宮人左寶瓶在浣衣局召驗和尚寶瓶咤曰此寘材殿下得免死送高墻竟不能知當時代寘材死者誰

也

寧庶人

寧庶人宸濠寧獻王權世孫也洪武十四年封獻王於大寧大寧在喜峰關外古會州地洪武初設北平行都司大寧城中東聯遼東西接宣府爲巨鎮文皇時封北平每歲秋九月會廣寧遼王及寧王宣府谷王大同代王太原晉王西安秦王韋州慶王甘肅王出塞捕虜名肅清沙漠以故諸王皆有重兵文皇靖難初與諸將議曰曩余巡塞上見大寧朵顏諸夷驍勇善戰戍卒皆間左罪

謫不能寒吾得大寧斷遼東得胡兵助戰吾事濟矣乃令世子居守率銳卒千人倍道趨大寧遺書寧王言窮蹙求救吾弟王邀文皇單騎入城執手大慟言不得已至此南兵百萬旦夕且破北平非吾弟表奏不可寧王爲草表謝請赦居數日款洽不爲備北平銳卒伏城外諸親密吏士稍稍得入城遂令陰結諸胡酋長及思歸之士皆喜定約文皇辭去寧王餞郊外伏兵起執寧王擁入關諸胡戍卒一呼皆集守將朱鑑不能禦戰沒總兵官都督劉貞遷還京師行軍都督陳亨皆降燕於是

靖難兵益強當是時寧王善謀時草檄傳諭靖難
 後遣內官書諭王再三王入朝相見甚歡因乞改
 南土初欲得蘇州 上曰蘇州圻內不許又欲得
 杭州 上曰五弟初封錢塘為吳王 皇考以為
 不可改開封建文無道封其弟允熲為吳王竟不
 克享建寧荊州重慶東昌皆善地惟弟擇焉寧主
 得書遂出飛旗令有司治馳道 上大怒王不自
 安屏從兵從五六老中官走南昌稱病臥城樓乞
 封南昌 上不得已即藩司為府改封王已而人
 告王誹謗巫蠱事 上書諭王王不自安稍稍自

歛戢 仁宗即位乞朝京師又言江西非其封國
 請改封 上諭王叔受封先帝已二十餘年朕不
 敢違 宣宗即位以大父行又復輒恣橫請於封
 內選子女不許重違其意賜女婦八十四人王令
 省中官服朝服用天子儀仗賀王元旦長至千秋
 節習儀鐵柱觀副使石璞聞於朝乞罪其長史王
 堅朝議定宗室將軍祿米視品王抗言宗室安得
 有品詞不遜時漢庶人方以反誅 上答書詞甚
 厲云將軍中尉有品 祖訓也王不得棄 祖訓
 肆煩說王即不謹非獨羣臣有言不已天下人心

亦不容已徒恃尊屬誣讖朝廷典憲具存朕不敢
庇未幾又乞灌城田不許稍斂戢托志神仙正統
十三年卒謚獻子盤斌未嗣卒謚莊惠世子景泰
元年以子奠培嗣王追封寧惠王奠培以世孫嗣
王景泰七年坐事革護衛弘治四年卒謚靖靖王
長子覲錫天順八年封上高王弘治五年嗣王十
年卒謚康康王庶子宸濠母馮針兒故娼也弘治
八年封上高王十二年嗣王濠輕佻無威儀好弄
喜兵嗜利狗色凌宗室瀆亂無禮養死士爲羣盜
江湖間及劫郡邑府庫財萬萬計術士李自然李

日芳妄言濠骨相天子也濠喜時時訶中朝事聞
謗言輒喜聞言明聖朝廷治卽怒不應正德初通
逆瑾賂金錢無算得復護衛安化王反瑾誅革護
衛未幾復結錢寧諸權奸又得復護衛益大肆擅
殺都指揮戴宣逐布政使鄭岳御史范輅幽知府
鄭獻宋以方盡奪諸附王府民廬副使胡世寧言
王橫無道不早裁抑禮樂征伐不復出自朝廷濠
出金璧萬計遣奄余欽入京徧遺中朝内外文武
大吏朱寧蕭敬張雄張銳江彬陸完石玠欲殺世
寧不果謫戍遼東自是益復無顧忌日與李士實

劉養正王春謀不軌又見武宗巡遊東宮久虛令典寶萬銳益賂諸奸佞欲召其子大哥入京以上廟燒香爲名幸事萬一成得自取正德十二年府典寶閻順內官陳宣劉良上變告濠疑出承奉周儀意盡殺儀家及典仗查武數百人令承奉劉吉持金錢又徧遺諸權奸佞幾殺順等於是逆謀益急妃婁氏累泣諫不聽大集羣盜凌十一閭廿四吳十三等數千人置丁家山諸處四出行劫置奄畢真鎮守浙江約起事爲應又約廣西土官狼兵及南贛峒蠻是時士實養正春吉銳日夜與濠

謀恐起事以反名人心未服伺一日宴駕大位未定乘變卽起萬一事成益遣奸黠人盧孔章等分布水陸孔道萬里傳報浹旬往返踪跡大露朝野皆知濠旦夕必反巡撫都御史孫燧日夜防遏濠托勦賊名置郡邑城郭兵食事甚悉嘗歎曰卽賊起吾不滅賊賊必以吾所處分故速滅又連上七疏言濠反在旦夕濠諸奸邀諸途卽不得諸權奸得濠金錢多恐事洩并誅又幸冀非望徃徃匿不聞十四年言官合詞言濠必反狀上遣駙馬都尉崔元都御史顏頤壽太監賴義諭宸濠令改過

府中人以爲召濠六月丙子因諸司入謝濠酒遂稱密旨反劫燧及副使許達燧達叱濠無反自速死吾死不從汝爲賊遂殺燧達僞授士實太師養正國師吉太監春尚書凌十一等都指揮急走人令畢真反杭州爲應遣涂欽等攻九江南康王春等發旁縣諸賊黨九江南康城破七月壬辰進攻安慶知府張文錦守將崔文楊銳力禦不肯下濠以江西僉事潘鵬安慶人遣鵬招安慶文誅鵬家濠議僭大號改年順德士實養正言宜至南京正位然後改元布詔是時汀贛都御史王守仁已傳

檄遠近討濠濠不敢離南昌已而聞守仁兵未集士實養正造僞檄指斥朝廷謂上以莒滅鄆

高皇帝不血食建寺禁內雜處妓女胡僧玩弄邊兵身衣異衣至於市井屠販下流賤品事靡不樂爲棄置宗社陵寢而造行宮於宣府稱爲家裏黷貨無厭荒遊無度東至永平諸處西遊山陝三邊所過掠民婦女索取贖錢又謂常懸都太監牙牌稱威武大將軍又謂旣奪馬指揮妻稱馬皇后復納山西娼婦稱劉娘娘原其爲心不能御女又將假此婦人以欺天下抱養異姓之子如前所爲也

留萬銳拱條等守南昌偽勅吉提督軍務叅政王綸叅贊軍務分諸賊爲五哨一百四十隊戊戌直趨安慶庚子攻城不克甲辰以天梯攻又不克安慶守益堅又聞守仁兵且至濠懼方欲退還南昌丙午聞守仁辛亥破南昌擒拱條萬銳及濠子三哥四哥濠大懼解安慶圍甲辰至樵舍乙卯遇守仁兵黃家渡戰敗丙辰又敗丁巳守仁急督戰火攻濠大敗婁妃投水死擒濠及其子大哥吉士實養正等濠曰紂用婦言亡而我不用婦言亡 上初聞濠反江彬等幸出巡遊勸親征遂下詔暴其

罪惡告郊廟革封爵削屬籍親統六師征之詔未下守仁已擒濠濠六月丙子反七月丁巳就擒濠反謀雖久意僥倖倚奸人得竊位不欲顯言稱亂及事急反始掠省城兵器燧已名討賊移外郡倉卒不能備招賊又爲諸下邑遇不得去諸僞將皆賊徒未嘗知戰士實養正徒以區區文詞議論負時名不知兵諸附者皆富貴子弟聞守仁倡義誅討未及見兵皆逃避去燧所置初城遇賊不得逸盡就縛濠檻車至南京諸權奸得濠金錢者尚在武宗左右或握兵間通語言濠謂且得釋獨忌守

仁有權術兵精慣戰不敢動回鑾至通州誅濠弋
陽王拱積攝府事初獻王五子二子盤輝臨川王
天順五年罪廢爲庶人幽高墻三子盤煥宜春王
四子盤炆新昌王五子盤煥信豐王弋陽王者靖
王弟奠燧始封弋陽謚榮莊榮莊子觀錄嗣弘治
十年卒謚僖順僖順三子長二子天季子宸訥弘
治十二年嗣正德九年卒謚莊僖莊僖次子拱積
正德六年封鎮國將軍嘉靖元年攝王府事二年
嗣弋陽王二十年爲稍設官屬子多焜嘉靖五年
封鎮國將軍存者八

岷王

岷王棟初封岷州洪武二十六年建邸雲南二十
八年之國建文初廢爲庶人流潭州靖難初復王
王與西平侯沐晟交惡 上賜書諭王召戒晟仍
還鎮未幾驕橫収印章殺官吏激變夷人沉酒廢
禮 上怒罪其府僚奪冊寶尋念王建文中久囚
繫復與冊寶洪熙元年徙武岡無王宮寄居州治
久之始建王宮宣德元年岷世子徽焮輒赴京奏
事勅止之途不止乃徽焮與奄謗其弟徽焯也
上爲斬奄遣徽焮歸景泰三年乞移湖廣善地不

許王卒謚莊時徽燦已封鎮南王矣莊王無子鎮南王嗣王王弟廣通王徽燦謀反以蒙能陳仔李祥為總兵事覺廢為庶人四年王乞朝明年正月不許卒謚恭子音堃嗣卒謚子膺鉅嗣卒謚簡子彥汰弘治十七年以江陵王封世子嗣王嘉靖八年江川王膺燧請加祿戶部尚書梁材言岷府郡王歲祿五百石米鈔兼支制也不許初彥汰與其弟南安王彥泥訐陰事彥泥廢為庶人彥汰坐荒淫敗度抗制擅權幽囚嫡母焚死逼迫多官稱臣亦革爵為庶人令其子世子譽榮攝理府事

嘉靖十年譽榮為父乞恩辭攝府禮官以見潯鍾鏡比奏授彥汰冠帶理府事十二年彥汰乞復王不許十五年上兩宮徽號詔復彥汰王

谷庶人

谷庶人穗母郭惠妃滁陽王女也生三王長蜀王次代王次如意王或曰即谷王也洪武二十六年建邸宣德即上谷建文初靖難兵起庶人走還京靖難兵至穗守金川門登城望見成祖麾蓋開門迎成祖成祖入即位賜穗樂七奏衛士三百及金銀鈔馬加祿歲二千石官其護衛指揮僉事

張興都督僉事儀衛正張成都指揮使已而改封
長沙之國驕橫尚書茹瑋不謁棹下詔獄死棹益
肆無忌造戰船弓弩器械招匿亡命習兵法戰陣
日與都指揮張成宦者吳智劉信等謀呼成師尚
父智信國老令公成智信亦輒應偽作讖書以爲
讖有十八云我 高皇十八子陰傳播惑衆製巧
燈上獻擇壯士入朝架燈又選壯士習音樂與燈
並上乘隙爲變奪民田侵公稅殺無罪人長史盧
廷綱屢諫不聽誣磔殺廷綱張興懼禍及已因奏
事北京白其狀 上未信興過南京啓 太子曰

臣冒死聞上 上顧不信臣言臣萬死願殿下垂
聽憶臣言他日得無連坐滅臣家臣死不朽棹又
遣劉信持所爲讖致書蜀王爲隱語曰德蒼時不
可言桓文之事桓文時不可言德蒼之施欲結蜀
王爲援蜀王切責不聽已而蜀王子崇寧王悅燁
得罪父投棹棹納悅燁因詭 衆曰往年我開金川
門出建文君建文君今在我宮中我將舉事爲建
文君復辟事將發會蜀王上變告永樂十四年七
月 上見蜀王疏歎曰朕待棹厚不宜有此心蜀
王忠孝又不宜欺我張興嘗爲我言我不忍信今

果然立命中官持勅諭懋令懋遣悅燁還蜀懋不
意使猝至不得已就徵十月至京入見 上以蜀
王章示懋懋頓首自伏言死罪死罪成國公朱勇
都御史劉觀諸大臣廷劾懋曰周辟管蔡漢戮安
長皆大義滅親陛下縱念懋奈天憲何 上曰懋
朕弟朕且令諸兄弟議明年正月楚王楨等各上
議曰懋違 祖訓謀不軌踪跡甚著大逆無道罪
誅不赦 上曰諸王奉大義國法固爾吾寧生懋
二月削懋及其二子賦灼賦煥爵爲庶人誅諸通
謀者興以先發庶人罪狀得不坐

韓王

韓王松初封開原洪武二十七年三月 上令王
及濟王省秦晉燕周齊王分道而行至秋八月始
還永樂五年卒葬南京謚憲子冲煖永樂八年嗣
二十二年改國平涼 宣宗初請徙江南不許言
居第隘遣主事毛俊經度并建襄陵樂平二邸及
岷州廣福寺陝西守臣言歲歉詔止勿建王又言
傍廬已撤卽冬寒工力愈難 宣宗令繕王宮罷
廣福寺又允王請蠲護衛二年屯種境內無鹽王
請鹽詔聽王易鹽正統元年上書陳邊防 上褒

同姓諸王傳 卷二
答正統五年卒謚恭子範圮正統七年以開城王
嗣王九年卒謚懷弟範抑正統十一年以西鄉王
嗣王景泰元年卒謚靖子徵針景泰元年以高陵
王嗣王成化五年卒謚惠子借沆成化五年以廣
安王嗣王十年卒謚悼弟借濤成化十二年以彰
化王嗣王弘治十四年卒謚康無子弟之子旭樾
弘治十七年以通渭王嗣王嘉靖十三年卒謚昭
子融燧嘉靖十五年嗣請食鹽食茶戶部言茶易
戎馬鹽供邊餉不許世子謨典諸王惟韓土瘠祿
薄人衆甚貧徃徃凌劫有司平涼知府吳世良廓

珩任守德王松皆被窘辱旭樾等百五十人至闌
總制尚書嘉靖十五年撫巡黃臣周鈇疏於朝榜
諭禁戢

藩王

藩王模趙貴妃子洪武二十四年封永樂六年之
國潞州 宣宗時王言諸子婚請展府府垣外盡
民廬也 上曰毀民廬以展王府不可命工部徃
閱繪圖來聞宣德六年卒謚簡子佶焯初封武鄉
王宣德八年嗣王景泰中王父子與州官數置酒
大會巡撫朱鑑上聞 上令諸王非時令萬壽節

不得輒會有司飲酒著為令天順元年卒謚康康
 王九子長天次幼孿天順三年嗣正德十三年卒
 謚莊莊王七子長銓鉦正德十三年以西陽王封
 世子嗣王嘉靖六年卒謚恭無子次銓鉦初封靈
 川王謚恭懿以長孫胤移嗣藩王贈藩安王恭王
 二子長勛壯初封福山王謚恭和以子胤禮嗣藩
 王贈藩靖王靖王一子長未名封次胤禮初管府
 事後嗣王卒謚懷無子安王銓鉦四子長勛潛初
 襲父靈川王卒謚恭裕以子胤移嗣王贈藩惠王
 次勛燧勛澈皆鎮國將軍四子未名封惠王一子

長胤移初襲祖靈川王懷王無子嘉靖十年諸郡
 王爭嗣王 上冊胤移嗣王次胤樞封鎮國將軍
 管靈川王府事胤移五子長未名卒次恬燧封世
 子

安王

安王楹洪武二十五年封平涼永樂十五年卒謚
 惠無子國除盡革府僚及樂戶留典仗校尉百人
 守園洪熙初封韓恭王平涼襄陵莊穆王冲炆者
 恭王子也支封附王國中 英宗令官校隸韓長
 史供安王祀暇日給襄陵王使令景泰五年冲炆

乞承祀安王正德十二年嗣襄陵王徵鈐遂請得樂戶祀安王明年樂平王徵鋹援鈐例亦請樂戶禮部言親王有樂戶郡王別城居者有事假鼓吹有司其附親王國者假樂戶移長史司因併革安王供祀樂戶嘉靖二年徵鈐及韓王旭樾又請上以安王故特允徵鈐徵鈐卒韓王融燧又令長史革祀安王樂戶徵鈐長孫旭種再請韓王融燧不許旭種上言禮樂自天子出韓王不得擅予奪融燧亦言親王郡王禮樂宜有降殺事下撫巡不能決條奏請制曰與樂戶爲安王祀也

唐王

唐王桎母李賢妃洪武二十四年封永樂六年建國南陽十三年卒謚定子瓊煙永樂十九年嗣宣德元年卒謚靖妃高氏未冊而王卒自經死追封唐王妃靖王世子芝 卒弟瓊烜宣德三年嗣成化十一年卒謚憲世子芝 先卒謚悼簡無子弟芝址成化十三年以舞陽王嗣王二十三年卒謚莊子彌錡以潁昌王嗣王嘉靖二年卒謚成無子弟文成王彌鉗之子宇溫嘉靖四年嗣王贈父唐恭王二十一年宇溫獻金千兩銀萬兩助建太廟

賜玉帶一歲加祿二百石

郢王 皇子楠

郢王棟母劉惠妃洪武二十四年封安陸二十七
年治邸墾田成之國在國六年卒謚靖無子除留
內外官校守國供王祀妃郭氏武定侯英女王卒
踰月妃痛哭曰賢王舍我去我寡婦也無子尚誰
恃對鏡寫容付宮人又痛哭曰候吾諸女長與之
令識母容也遂自經卒王四女宣德四年梁王之
國移宮人居南京令諸郡主議婚舊國賜第南京
太監王景弘資給女封光化穀城南漳郡主歲加

祿各八百石一天郢王弟伊王伊王弟楠楠於諸
子中最少洪武二十六年十二月生未逾月而卒

伊王

伊王橈母葛麗妃洪武二十一年生永樂六年之
國河南歲祿僅二千石卒謚厲子顥煥嗣請選官
人不許令選之護軍家酬直勿抑勒卒謚簡子勉
溍正統八年封上洛王嗣王天順八年卒謚安子
諲銳成化二年嗣十一年卒謚悼季弟諲鏐成化
四年封邾城王十二年嗣王正德三年卒謚定子
訐淵弘治三年封世子正德六年嗣嘉靖五年卒

謚莊弟許淳弘治六年封濟源王嘉靖六年嗣王
許淳言祿薄先朝乞得河南課鈔五萬七千七百
貫准祿米八千嘉靖八年革諸王請乞稅租田湖
伊府課鈔亦在革中乞補祿戶部言伊祿二千石
通給本色 英宗加米五百石 憲宗又加麥一
百五十石課鈔本成化弘治正德年請乞非永樂
以前欽賜比况河南一省諸王缺祿八十餘萬不
許二十一年卒謚 子典模以世子嗣王

皇明同姓諸王傳第二卷

子履準校

孫心材重校

